

# Die hüttigi Zit

---

Über das Zeittotschlagen  
Sprechnummer zum Thema Zeit  
aus dem Programm «Zit isch do.com» 2001  
Basler Mundart

©Aernschd Born 2001  
Verbreitung mit Genehmigung des Autors

I finds no verruggd, wie die hüttigi Zit mit dr hüttige Zit umgoht. Villicht isches nur e Ziterschiinig, aber in letschter Zit isch es absolut Zitgemäss, käini z ha.

Wär Zit het isch out. Wär hütt no Zit het, passt irgendwie nümm in die hüttigi Zit. Wär hütte Zit het, isch vo geschter. In dr hüttige Zit hesch käi Zit, hüt hesch Termin.

Hesch Termin, hesch käi Zit. Hesch Zit, hesch käini Termin, also käi Erfolg. Und drum wird – absolut erfolgsorientiert – in dr hüttige Zit die hüttigi Zit zerschört, wos numme goht. Für dass mer als erfolgsorientiert Zitgenosse stolz könne sage, sorry: käi Zit me.

Am beschte zerschörtsch di Zit mit Termin. Termin frässe sich in d Zit, wie Termite in afrikanischi Pfahlbauersidlige. Die verbisse sich in d Pföhl und no bevor si obe aako sin, hän si si gfrässe. D Sidlig gheit obenabe, vergrabt die äinte Termite unter sich, wird aber vo de andere überläbende termite rundumme ratzekahl uffgfrässe.

Genau so makes Termin mit dr Zit. Termin läbe vo dr Zit. Si frässe sich an de Süüle-diagramm z deruff und no bevor si obe aako sin, hän si si gfrässe. Die ganze Zitgebäude gheie in sich zämme und vergrabe e paar Termin unter sich. Aber denn frässe die überläbende Termin rundumme die verbliebende Zittrümmer ratzekahl uff, bis denn dr Terminbsitzer, also dr Terminator, stolz ka sage, sorry: käi Zit me.

Millione vo Dollar het dr Terminator investiert, zum d Zit z todschloh. Aber Zit rächt sich. Mit dr Zit schloht si zugg. Mit dr Zit schloht Zit zugg. Bis jetz het d Zit no jede gschafft. S wird au immer schwieriger, d Zit in Griff zkiege, will uns Zit immer wie schnäller drvosegget.

Jä mi wunderets nit. Je schnäller mir in dr hüttige Zit dr hüttige Zit nochjage, zum si z todschloh, descho schnäller jagd si drvo. Wurd ich ämel au so mache.

Könntemer villicht emol drüber noochedängge, wemmer Zit hätte.

Aber villicht wär das e Tagesornigspunggt für e nöggtschi Sitzig. Do findemer sicher e Termin.